

Silva Semadeni remetta il presidi

Sut il timun da la cussegliera naziunala grischuna è la Pro Natura sa sviluppada considerabel

■ (anr/ac) Suenter 16 onns al timun ha la cussegliera naziunala grischuna Silva Semadeni annunzià sia demission dal presidi da la Pro Natura sin la fin zercladur 2018. Durant sia perioda d'uffizi è l'organisaziun per la protecziun da la natira sa sviluppada fermamain.

Durant 22 onns fa la cussegliera naziunala grischuna Silva Semadeni part da la suprastanza centrala da la Pro Natura e dapi 16 onns presidescha ella ina organisaziun che s'engascha per la protecziun da la natira. Sco quai che la Pro Natura scriva en ina communicaziun è l'organisaziun sa sviluppada fermamain durant il presidi da Semadeni. La comembranza da la Pro Natura saja creschida da 98 000 sin 133 000 commembras e commembers e la forza finanziaria da l'organisaziun saja sa dublegiada entaifer quel temp, scriva la Pro Natura. La presidenta da la Pro Natura derivanta dal Puschlav haja giuga ina impurtanta rolla per il spiert da cuminanza tranter la centrala da l'organisaziun a Basilea e las 23 secziuns chantunals da la Pro Natura ed era visavi la varietad culturala e linguistica. Semadeni ha exprimì ses plaschair dal sustegn creschent en la populaziun en favur da la natira. In impurtant sustegn tenor il parairi da la presidenta partenta da la Pro Natura per mantegnair palis, ognas e prads da fluras sco spazi da viver per spezias periclitadas. Ina intervenziun parlamentara da la cussegliera naziunala da cuminanza cun ina campagna da la Pro Natura ha dà il signal da partenza per novs intsches da protecziun en Svizra. Sper il Parc naziunal en l'Engiadina èn sa sviluppads durant ils decennis passads 16 parcs da la natira regionals che porschan, tenor la Pro Natura, impurtants impuls en la protecziun da la natira ed en il svilup regional. Tantpli deplorascha Semadeni il na da la maioritad da las vischnancas involucadas al Parc Adula. Ella ha ditg dad esser anc adina fermamain persuadida che quel parc fissi ina gronda schanza per la regiun pertutgada. La proxima schanza da realisar in ulteriur parc vesa ella en il Parco Nazionale del Locarnese en votaziun la stad 2018.

En favur da natira e cultura

L'engaschi en favur da la natira da la cussegliera naziunala grischuna ha gia cumenzà blers onns avant l'entrada en la suprastanza centrala da la Pro Natura. A partir da l'onn 1970 fa Semadeni part da



Sa retira suenter in engaschi da dus decennis en la suprastanza ed al timun da la Pro Natura: La cussegliera naziunala grischuna Silva Semadeni.

MAD

l'Uniu grischuna per la protecziun da la natira ch'è oz ina secziun da la Pro Natura. L'engaschi per la natira è sper quel en favur da la cultura e las minoritads in dals fils cotschens da la politica da Semadeni. Ella ha dentant era fatg attent che la natira saja vinavant sut ina gronda pressiuin dal svilup da l'economia e dal traffic uschia che la lavur da sia successura e da la Pro Natura restia vinavant impurtanta. Nagina fadia ha la cussegliera naziunala grischuna cun las cuntraversas en connex cun ils animals da rapina. Ella ha dtg dad esser sa participada a diversas discussiuns en connex cun ils animals da rapina ed haja chapientscha per las temas exprimidas e saja adina stada pronta dad acceptar autras opiniuns. Insumma vali-

tescha la presidenta partenta da la Pro Natura il chantun Grischun per averters la protecziun da la natira. Ella ha fatg attent a diversas votaziuns federalas che sajan vegnidas acceptadas dal suveran grischun. Per exempel ha Semadeni numnà la strategia d'energia da la confederaziun sco la planisaziun dal territori ed il dretg da recurs concedi a diversas organisaziuns ch'il suveran grischun è sta pront da mantegnair cun la maioritad dal suveran svizzer.

Impurtant per in chantun turistic

Ina natira intacta e per Semadeni impurtanta, tant pli per in chantun turistic sco il Grischun. Or da sia vista probabel il motiv ch'ella è cuntinuadamain s'enga-

schada envers projects lantschads per realisar Gieus olimpics en il chantun Grischun. Annunzià ha la cussegliera naziunala grischuna gia avant in temp da betg pli candidar per ina ulteriura perioda en il cussegl naziunal. Activa en il cussegl è Semadeni tuttina, cun ina interpellaziun ed ina moziun ha ella actualmain en il focus politic la candidatura da la Svizra romana per ils Gieus olimpics 2026. Tar la Pro Natura èn ins para conscient dals avantatgs da la preschientscha politica dal timun da l'organisaziun en il parlament federal. La suprastanza centrala propona per la successiun da Semadeni sco presidenta da la Pro Natura la cussegliera naziunala dal chantun Fribourg, Ursula Schneider.